

# 1 Timoti

## Teik pasi Pol hani Timoti

### Kakain ti haxewai teik pepa ie

Pol tel aposel tai teik pas ie hani Timoti sai ahang 34 muhin ti Jises moih aliawa ape Haeu waxi i hani tesol tonan. Timoti i tel hualian ti ailei pupuasan ape Pol tiheli i tehu taon Epesus ngahatai teka kahikahi Jises ien. Tel tinan i Ju a tel taman i Grik. Timoti hong soh ti Jises Krais lokon ti Pol kaxi ahuti meng solian ti Jises. Aile ape Pol axai i natun. Pol kakane hakui Timoti ti aka haxoi namilon ti Jises Krais ma usi kapitiniai kakain salan ti Haeu nake kilan teka laha hanau hakalala seilon ti aweisali Haeu. I hahanau sale nanahihi ti teka masiwi lehe lato neini aluini teka kahikahi Krais. Tin i nanau teka kahikahi Krais liai lehe lato aile saun tenen ti Haeu amuke. Pol pahan Timoti sohot hawanewa unau Haeu tenen pate solian, tetel lawe i usi hatapo namili Haeu.

**1** <sup>1</sup> Teik pas ie tataiak nga Pol tel aposel ti Jises Krais hani o Timoti. Haeu tetel awaiakako ma Jises Krais, tetel i hasohotu lawe waliko ti kako to mon atetengi, lalu hauhua kilami nga aposel.

<sup>2</sup> Timoti, o masin natuk wanen nake o soh hawane kakai Haeu ti nga kaxi ahuti haniwen o. Nga kamei Haeu tel Tamakako ma Jises Krais tel Masiwi ti kako lehe lalu kola lalape soliaialalu hetekie tatahan ma hatona hasolia tiam.

### Hahonghong ti sale teka hanau waliko kumahe salan

<sup>3</sup> Timoti, o tiliwen Epesus, masin ti nga honewen o ti nga lua salili o hani texux xux Masedonia. Hina seilon laha hahanau waliko tenen kumahe salan. Kakane elieliwa laha kum ailele. <sup>4</sup> Honewa laha kum kakaxi meng tenen kumahe salan ma lioiwa kakain weluwelun ti nenex. Waliko tenen ien hatanoi lungelunge ma halialui wasol. I kum huali uke seilon ailei puase Haeu. Mewenae na namili seilon xoxoan ti Haeu laha pon ailei waliko ti Haeu pahan.

<sup>5</sup> Nga hani o tenen puasain ien nake Haeu pahan seilon he wawahenawa ti leili atelaha. Laha pon kolai wawahen tenen ien na

namilolaha xewan ti tioiai waliko solian ma lialun hetekie na namilolaha tin xoxoan wanen ti Haeu. <sup>6</sup>Hina seilon laha sel ti saun tenen ien ape laha to aile kakapitini kakain tenen tap pupuasan. <sup>7</sup>Pahalaha lehe seilon paxai tioiwa ka laha teka hanau nauna ti Moses tuahe laha kum xe waliko ti laha kakak kalak laha kak mamatuke hanowi ka laha tioi.

<sup>8</sup>Kako tioi ka tesol nauna ien solian na seilon puas usi aluini. <sup>9</sup>Kumahe Haeu aile tanomi tetesol nauna hani teka laha hong tamani kakaian tuahe kane teka xaputiai nauna tetan ma tahiai kakaian, teka laha kum nam waxi i ma aile haweluwelu saun lialun, teka laha namiloi ukek i kumahe tuah ma laha kum lotui i, teka laha telei tamalaha ma tinalaha, ma teka laha telei seilon liai. <sup>10</sup>Tesol nauna ien tin kane seilon tenen laha to ailele saun lialun ti wawan hehin, teka laha ailele sikisiki tenen ti pate hienain, teka laha lungei waxi seilon ape hangaini hani unau seilon liai, seilon ti weli puputa, teka laha putini laha aile waliko ma teka laha to ailele waliko liai tenen lialun. Na laha to ailele tesol waliko ien, laha pahoxai kakain salan i ahuma ti Haeu. <sup>11</sup>Tenen kakain salan ien kako tunahi leili tenen meng pate solian ti Jises. Haeu tel pate tuah hani nga kaxi ahutian.

#### **Pol kak kemulik nake ti lalape soliai Haeu**

<sup>12</sup>Nga kak kemulik hani Jises Krai tel Masiwi ti kako, tetel i hakui nga ailei puasan nake i namiloi ukek nga unauan solian ma i kilami nga puas tetan. <sup>13</sup>Kalak ti imat lawe nga kak saxuti Jises Krai ma aile halialu hawane teka kahikahin, ti lalape tatahan ti Haeu, i kum axi nga kawatan. Lokon ien nga tai soh ti Jises Krai ape waliko ti nga ailele, nga kum tioi ka lialun. <sup>14</sup>Kalak wouk pate lialun, Haeu aile kola lalape soliaian hani nga ape i hani nga namil xoxoan ma wawahen tenen Jises Krai hina.

<sup>15</sup>Tenen kakain ie se pate salan wanen ma lawe seilon hong sohoa. Jises Krai sohot hanima tehu pon ie awai seilon ti kaui kawatan ti lialui woulaha. A nga tel pamu lialuan ti lawe seilon lialun. <sup>16</sup>Tuahe kalak wouk lialun, ti lalape tatahan ti Haeu, i kum axi nga kawatan. Jises Krai i kum saxoh lengeiniak tel seilon pate lialun. I aile kola ka teka seilon lialun liai, tin i pon laha soh tetan ape laha pon ukei tonain kapi Haeu ti tap tahi tapoan. <sup>17</sup>Aile ape kako haxawawa ma amukewa Haeu lian tehue. I tel Masiwi tapein, nenein tetan tap tahi tapoan. I tap tahi matean. Tap tel ningahi uke i. Telawe i Haeu. Salan wanen.

#### **Pol kak hakui Timoti**

<sup>18</sup>Timoti tel natuk, waliko ti nga hohone o ailean, masin ti teka kuluiai kakai Haeu kakawen imat sale puasam. Nga hanamena o lehe o puas hapoponowi kakaialato kalak hina seilon laha pahoxai o. Tu xoxoa masin tel seilon kuin leili hile. <sup>19</sup>Haxoxo tatalewa namilom ti Krai ape ailewa

saun tenen o tioi ka sawisawin. Hina seilon laha lioiwen saun tenen ien ma xoxoi namilolaha i putawen, hanowi tea waian na i oh manan he hok. <sup>20</sup>Leilolaha Himeneus ma Aleksanda. Hauhua nga hani lioiwen Satan lehe ti lalape kawatan ien lalu paxai tioi lialui woulalu ape lalu aile tapeini kak hialalui Haeu.

### Pol hahanau sale lotuaii Haeu

**2** <sup>1</sup>Nga kakane eliel o ma teka kahikahi Krai kapim, amuto lotu hualiya lawe seilon. Kameiwa Haeu hualialaha tenen ti na laha tap ape kak kemulik haniwa i. <sup>2</sup>Lotu hualiya teka ngahat ma teka masiwi ti xux. Na laha nahike hasolia xux, totonakaha soli ape tap hilehile. Ape tap tenen waliko i kongini kaha ti lotuaii Haeu ma ailei tenen na Haeu pahan. <sup>3</sup>Saun tenen ien solian, i hamuamua Haeu tel awaiakaha. <sup>4</sup>Pahan i awai hatesol seilon ti kawatan ti lialui woulaha ma tin laha xewawa sale mengon. <sup>5</sup>Haeu telawe ti lawe seilon ape tin telawe hukuminiai Haeu ma seilon. I se tetel seilon Jises Krai. <sup>6</sup>Puki alia i kahui lialui woukaha hatesol. Jises Krai mat ti ukei totone lawe seilon. Tenen meng ien Haeu hani amite kaxi ahuti aope ie. <sup>7</sup>Aile ape Haeu kilami nga tel aposel ma ti kaxi ahutiai mengon. Nga tel hanau teka kumahe Ju kakain salan sale Jises Krai. Kumahe nga tua kaxi putini. Kakain ien salan wanen.

<sup>8</sup>Tapai tesol tesol amuto apuha ti lotu, pahak teka wawan tuliniwa minalaha lotuaii Haeu, tap lengelenge ma wasol lialun.

<sup>9</sup>Tin pahak teka hehin puxui ma sosoi aluiniwa sosolaha lehe seilon kum paxai kapitini laha. Laha kum aile hahakila tenen tenen hani ukulaha ma hahakea waliko tenen pate buah masin gol he tinulaha. Laha kum soosoi maia tenen kahun pate lalap. <sup>10</sup>Nga kak ukek ien nake teka hehin laha lotui Haeu, laha solian ma buah ti puli Haeu na laha aile puasain solian.

<sup>11</sup>Teka hehin hong aluiniwa ma puas usiwa hatesol waliko teka masiwi hahanau. <sup>12</sup>Nga kum sowini hani teka hehin to masiwi ti teka wawan ma hanau alaha kakai Haeu ti puli lawe seilon. Laha kewa hong matainai kakain. <sup>13</sup>Pake Haeu tanomimu Adam tel wawan, ape imuh i tanomi Iv tel hehin. <sup>14</sup>Kumahe Adam tel Satan puluti, i puluti tel hehin ape i tahi kakai Haeu. <sup>15</sup>Tuahe Haeu awai teka hehin ti kawatan ti lialui woulaha na laha hehin tenen tinawi, na namilolaha xoxoan tetan, laha waheni seilon liai, laha hani hatapo Haeu tupualaha hetekie saun tenen i amuke.

### Sale teka masiwi ti kahikahi Krai

**3** <sup>1</sup>Na tel seilon pahan wanen i sohot masiwi ti teka kahikahi Krai, i namiloi kewak tenen puasain ien pate buah wanen. Tenen kakain nga kakak ie se salan wanen. <sup>2</sup>Aile ape i kewa seilon tenen tap tel pon tienian ti tenen na waliko. I hamalumua kapi telawe axoan. I kewa seilon

namilo ti tahiai isiai pahan ti ailei saun lialun. I ailewa saun tenen ti seilon liai sameni. I kewa seilon tenen i amuke auniai soliya ma tin i pon hanau seilon liai. <sup>3</sup>I kum un kakasia unum ailan. I kewa seilon ti watakaiai hilehile ma kak hapatapat kapi seilon liai tuahe i kewa seilon ti hasoliai wasol. I kum halepelep moni. <sup>4</sup>I ngahati hasoliawa teka lohe ingan. I hanau hasoliawa natun ti hong tamaniai kakaian. <sup>5</sup>Na tel seilon kum pon ngahati hasoliai teka lohe tehu ingan, pamu i kum pon ngahati hasoliai teka kahikahi Krai. <sup>6</sup>Kewa i kumahe seilon ti i sosohotua kahikahi Krai pala aope uke i sameni aliake i ka i sohot kosea masiwi. Na i aile ukek ien, Haeu axi i kawatan tenen ti i hanimu Satan. <sup>7</sup>Tel masiwi ti teka kahikahi Krai ailewa saun solian lehe teka seilon laha kum soh ti Krai laha kak sameni i. I kewa tap woun lialun lehe tap seilon misahi i ape i kum put hani totohong ti Satan.

<sup>8</sup>Tin masin teka masiwi laha pupuas hahitake masiwi ti teka kahikahi Krai, laha ailewa saun tetenen ti teka liai sameni. Kewa laha seilon tenen kumahe leholaha huoka. Laha kum un kakasia unum ailan ma kum pupuluti seilon ukei moni. <sup>9</sup>Laha hana hatapoa namilolaha ti usiai lawe kakain ti Haeu hatakei haniwen kako. <sup>10</sup>Imat ti laha kilami teka masiwi ti teka kahikahi Krai, paxai aluinimua woulaha ma puasalaha.

<sup>11</sup>Axolaha tin kum kak hahaliulu seilon liai. Laha kewa hehin tetenen seilon liai sameni. Laha tahiwa isiai pahalaha ailei saun lialun ma aile usiwa saun solian ti puki laha ukek laha aile.

<sup>12</sup>Tel masiwi i pupuas hahitake teka masiwi ti teka kahikahi Krai, i hamalumua kapi telawe axoan ma ngahati hasoliawa teka lohe ingan. <sup>13</sup>Teteka masiwi na puasalaha solian, teka liai namilo i ukek laha seilon pate tuah ape puki laha kak matut uke sale xoxoi namilolaha ti Krai.

### **Pol kaxi waliko ti Haeu hatakei sale Jises Krai**

<sup>14</sup>Pahak wanen nga tahia kosea hani kapim tuahe nga kum tioi aluini loke tahiaiak. Aile ape nga tai tesol nauna ie hani o. <sup>15</sup>Na o ridaiwa teik pasuk ie, o tioi saun tenen ala teka kahikahi Krai aile nake laha seilon ti Haeu, tetel pate pohen. Masin ti tehu kuku tuah i sekui haxoxo tehu ing, tin masin teka kahikahi Krai laha tu xox ti meng salan ti Haeu lehe i puas ti teka seilon liai.

<sup>16</sup>Lawe waliko ti Haeu hatakei hani seilon sale Jises Krai se pate tuah ma salan wanen. Masin ti tenen pak i ukek,

Jises Krai i sohot seilon wanen.

Holi Spirit kola hani kaha ka i tel Nati Haeu.

Teka engel ningahi i muhin ti

Haeu xahateniwa i ti matean.

Ti Haeu waxi i hani tonan,

i kola lalape pohen ma soliaian.

Teka kahikahi Krai kaxi sasawateni mengon  
hani teka seilon ti tesol tesol  
ape kilan ti laha soh tetan.

### Pol kakak teka mengolaha puputa

**4** <sup>1</sup>Holi Spirit kak hahaxewa ka imat ti aliai Jises Krai hina seilon laha aka lioi namilolaha ti usiai kakai Haeu ape laha hong usi teka laha hahanau meng tenen puputa i ahuma ti spirit lialun. <sup>2</sup>Tesol hanau seilon ien leholaha huoka ma laha puluti seilon ka mengolaha salan. Nake ti lialui woulaha laha kum ttoi waliko tenen solian ma na lialun.

<sup>3</sup>Laha halini na seilon sal ma aniai hina an. Tuae Haeu namiloi ukek ewi na seilon sal ma i tanomi hatesol an lehe teka laha ttoi ma soh kakaian laha amuke hahuonen ape kak kemulik hani i. <sup>4</sup>Lawe waliko ti Haeu tanomi se solian, kako kum wawataki na tenen, waxi amukewa ma kak kemulik haniwa i. <sup>5</sup>Puki Haeu ukek lawe waliko i tanomi se solian ape na kaha kak kemulik hani i, namilokaha tin i ukek tesol waliko ien solian.

### Tel unau Krai solian

<sup>6</sup>Timoti, na o hanau tesol nauna ien hani teka akikikako ti Jises Krai, o tel unau Krai wanen, tetel i lap hetekiema kakain salan ti Haeu ma puas usi hatapoan. <sup>7</sup>Kum sohosoh leili kakain ti seilon tua aile tanomi ma tap pupuasan tuahe hanau elieliwa o waliko tenen Haeu pahan. <sup>8</sup>Solian na seilon puas ti hakuiai tupualaha tuahe pamu tuah na laha puas usi kakai Haeu nake i hani laha tonain solian ti aope ma ti imuh kapin, masin ti i kakawen.

<sup>9</sup>Waliko ti nga kakak ie pate salan. Lawe seilon hong sohoa ma nameni konginiwa. <sup>10</sup>Kako teka kahikahi Krai puas eliel hahawane nake kako hana hatapoen namilokako hani Haeu, tetel pate pohen. I tetel awai ai lawe seilon ti kaui kawatan ti lialui woulaha kasinan teteka laha soh tetan.

<sup>11</sup>Hanau teka seilon tesol waliko ien ma honewa laha puas usian. <sup>12</sup>Kum hahani seilon liai nam teheni o nake o uluha. Ailewa saun solian lehe teka kahikahi Krai paxai ukene. Lawe kakawa ma ailewa waliko tenen solian, waheniwa seilon liai ma kum ailele saun lialun. Hana hatapoa namilom haniwa Haeu. <sup>13</sup>Imat ti nga tahia hani kapimuto, lawe ridaiwa pepai Haeu hani teka kahikahi Krai, hanau laha aweisali Haeu ma kak hakuwa laha puas usian.

<sup>14</sup>Aile tatalewa tenen puasain ien pake Haeu huali o ailean masin ti Holi Spirit hanamiloa teka masiwi kakaneam lokon ti laha hana minalaha patul tetam ti lotu hualiam. <sup>15</sup>Puas usi hawanewa tesol waliko ien ti atem wanen lehe lawe seilon ningahi ka wawahen tetam ma wasolamulu Haeu i to soli

aheahewa. <sup>16</sup>Kanipetiwa nanahiam ma lawe pupuasam. Hanaua mewenae waliko tenen salan. Kum lilioi kakai Haeu lehe i awai o ma teka laha hong usi kakaiaam ti kaui kawatan ti lialui woumuto.

**Nauna ti Pol hani Timoti sale neinia teka kahikahi Krai**

**5** <sup>1</sup>Kum tutumei tel wawan pamu salaimat tuahe kak hamalehua hasawian hanowi ti na o kakane tel tamam. Aile haniwa teka wawan uluha hanowiwa ka laha ukalam wanen. <sup>2</sup>Aile haniwa hehin tenen pamu salaimat hanowi ti o aile hani tel tinam ape teka uluha masin ka laha tuam wanen, kum wawaleni laha.

<sup>3</sup>Honewa teka kahikahi Krai ka laha auniwa ma kolawa saun solian hani teka hehin axoalaha matewen a tap seilon aunialaha. <sup>4</sup>Tuahe na tel hehin axoan matewen a i hina natun, tesol natun kolawa woi Haeu ape auni kahui aliakewa tel tinalato. Saun tenen ien i hamuamua Haeu.

<sup>5</sup>Hualiwa teka hehin axoalaha matewen, namilolaha xoxoan ti Haeu a tap seilon aunialaha. Tek a hehin ien laha lotu ngain ma ipong kameia i huhual ti Haeu. <sup>6</sup>Tuahe teteka hehin axoalaha matewen a laha tua nam waxi hamuamuaialaha, laha masin seilon maten, laha kum hani Holi Spirit ti kapitalaha. <sup>7</sup>Kaxi kuluiwa nauna ie haniwa teka kahikahi Krai lehe laha puas usi ape tap tel i howini halialu laha.

<sup>8</sup>Tel na i kum auni hasolia akikin, kasinan na i kum auni teka lohe ingan, i kola ka namilon kumahe xoxoan ti Haeu ma i tel seilon pamu lialuan ti teka laha kum soh ti Haeu.

<sup>9</sup>Tai hanawa axe teteka hehin axoalaha matewen, ahangulaha kumahe itan ti 60 ma laha hahamalum kapi telawe axoalaha ti lokon axoalaha moihin tutuen. <sup>10</sup>Hualiwa teka hehin ien na axalaha lalap ti soliai pupuasalaha. Puasain tenen masin ie: auni hasoliai natulaha, ngahatia i teka solia, teheni aliakealaha ti aile kolai saun ti wawahen hani teka kahikahi Krai, hualiai teka laha leili kawatan ma ailei saun solian tenen tenen hani seilon liai.

<sup>11</sup>Tuahe kum hahana axe teka hehin axoalaha matewen a laha uluha tutuen, uke ti isiai tupualaha laha nam maluhe puasalaha ti Krai. <sup>12</sup>Na i sohot ukek ien, laha hahitake lengei Haeu nake laha aka lioi tenen puasain ien ti kemuk laha kak tutuoha ailean. <sup>13</sup>Tin laha uke nunuxa ailei puasain ma lolia mimisah hani ing tehu tehu. Laha tua nihini laha hani waliko ti seilon liai ma kakak waliko ti ala kumahe ti laha kak. <sup>14</sup>Nauna tetak hani tesol hehin ien ukek, laha sal uleawa ma auni hasoliawa axoalaha ma natulaha lehe teka seilon watakai alaha kum howini halialu laha. <sup>15</sup>Nga kak ukek nake teka ti laha talewen tehitolaha hani Haeu ape laha ailele waliko tenen Satan pahan.

<sup>16</sup>Na tel hehin kahikahi Krai i hina akikin hehin ti axoan mat saliliwen, kewa i aunian lehe i kum hakawata teka kahikahi Krai liai. Laha hualiai teteka hehin axoalaha matewen ti tap seilon aunialaha.

<sup>17</sup>Teka kahikahi Krai, aile aluiniwa ma kahui haponowiawa teka masiwi ti neini hasoliaiamuto, hanauamuto ma ti kaxi haniamuto meng solian ti Jises Krai. <sup>18</sup>Masin ti teik kakain he pepai Haeu ukek, “Kahui hasoliawa teka seilon na laha pupuas.” (Deut 25:4) Tin i ukek, “O kum xioti mimingini awe tok bulmakau ti halinian aniai komem ti o hahapuasa i ailei tenen puasain ti selaiai komem ti he ulin.” (Deut 25:4)

<sup>19</sup>Kum hong wawaxi na seilon telawe sului tel masiwi ti teka kahikahi Krai, mewenae na seilon hua ma na tolu kakaxi ka lato ningahi i aile waliko tenen lialun. <sup>20</sup>Na tel i aile waliko tenen lialun, kaxi hatakei haniwa teka kahikahi Krai lehe ape laha mamata ailei saun lialun.

<sup>21</sup>Usi hatapoa hatesol nauna ien, kum aile nenexi seilon. Nga kak ukek ie ti puli Haeu, Jises Krai ma teka engel ti Haeu.

<sup>22</sup>Kum saxohuxoh kilamiai masiwi ti teka kahikahi Krai, paxai aluiniwua woulaha. Kum tutuai seilon ailei saun lialun a puki o haelieliwa lehe o hamalum seilon tenen ti Haeu amuke.

<sup>23</sup>Kum unuun mewenae kan, tin unua teik kokole waen hualiai tiam nake lawe o tinu.

<sup>24</sup>Nameniwa tetenen ie. Hina seilon saun lialun ti laha take kosea. Aile ape o tioi woulaha imat ti o paxai kolongeni laha. Tuaehe teka liai, saun lialun ti laha seilon po tioi imuh. <sup>25</sup>Tin masin, hina seilon saun solian ti laha take kosea. Tuaehe teka liai, saun solian ti laha seilon kum paxai tioi hulutini, laha po tioi imuh.

**6** <sup>1</sup>Teka kahikahi Krai laha unau seilon, laha kolawa puasain solian ma hong usiwa teka masiwi ti laha lehe teka seilon liai kum kak teheni Haeu ma hanauan ti kako. <sup>2</sup>Na teteka masiwi lato tin kahikahi Krai, tesol unauwalato lato kum nanamiloi ka ewi ti tahiai kakaialato. Laha nameniwa ka laha se hahitakalato. Ala pamu laha puas eliel ahewa nake laha pupuas hualiai seilon ti Haeu, teteka laha waheni.

### **Teka hanau waliko tenen puputa ma teka halepean ti moni**

Timoti, hanaua teka kahikahi Krai tesol waliko ien ma kak hakuiwa laha aile usian. <sup>3</sup>Tel na i hanau waliko liai tenen, i kum onoteni kakain salan ti Jises Krai tel Masiwi. Kumahe i huhuali seilon ailei saun solian ti Haeu pahan. <sup>4</sup>Tel seilon ien i namiloi haxawa aliliake i. I sokok i tioi hatapo waliko tuahe tap wanen titioan. Pate i waheni kak hapatapat kapi seilon ma lungelung sale kakain. Tesol waliko ien i hasohotu tumetume ma aile seilon six lalolal ti namil lialun hani seilon liai. Tin i aile laha kak halialu seilon ma namilolaha lawe lialun nake seilon liai xoini laha ti tenen na waliko. <sup>5</sup>Tin laha kum paxai tioi waliko tenen solian ma lialun ma lawe laha kak hilehil kapi seilon liai. Laha kum paxai tioi waliko tenen salan ma puputa. Laha sokok laha uke kilan soxi na laha hanau seilon sale Haeu.

<sup>6</sup>Tuahe soxi kilan i kum hapono hasolia totonakaha. Mewenae na kaha hana hatapo namilokaha hani Haeu ma kaha amuke waliko tenen ti kaha hina, Haeu hapono kaha. <sup>7</sup>Pake tap tenen waliko kaha hina ti kaha takahama ape tin tap tenen waliko kaha waxi ti kaha ti kaha mat. <sup>8</sup>Aile ape na kaha hina an ma sosokaha, kaha amukewa waliko ien.

<sup>9</sup>Teka pate pahalaha isian lehe laha kilan soxi, isian ti laha i aleheteni laha ape laha put ti ailei waliko tenen lialun. Tesol isialaha ien aile haliulu laha ape laha lialu tautamus masin na tea waian i taxix itax leili laman lalap. <sup>10</sup>Xoxoi namil ti moni se puole waliko lialun tenen tenen. Hina seilon laha hana hatapo namilolaha ngahoi moni ape laha tale tehitolaha hani Haeu. Aile ape laha kau lamani kawatan masin seilon ti i tapuhi aliake i ngol.

### **Tapeini nauna ti Pol hani Timoti**

<sup>11</sup>Tuahe o Timoti salini hatapoa hatesol waliko lialun ien nake o seilon ti Haeu. Haelieliwa ka o aile waliko mewenae sawisawin, lawe ailewa waliko tenen Haeu pahan hetekie xoxoi namilom tetan. Waheniwa seilon liai ma lawe aile aluiniwa laha. Kum aka lilioi puase Haeu kalak kawatan tunahi o. <sup>12</sup>Masin tel seilon leili lokolokoi wa, i hana hatapo namilon ti ukei kahun ti tehu lokoloko ien, tin masin o hana hatapoa namilom haniwa Haeu. Aka haxoa tonain kapi Haeu ti i haniwen o. Nameniwa o kak ahutiwen ka o soh hawane ti Jises Krai ti puli kilan seilon. <sup>13</sup>O tioi kewak, nga hahani o tesol nauna ien ti puli Haeu, tetel i axi hanawain hani lawe waliko moihin. Jises Krai tin i papaxai. I tetel i kaxi ahuti xoxoi namilon ti Haeu hani Pontius Pailat. <sup>14</sup>Usi hatapo hawanewa tesol nauna ien lehe tap tel i pon tieniam ti tenen na waliko, atengi tataen ti Jises Krai tel Masiwi aliama. <sup>15</sup>I po aliama taun ti Haeu kilamiwen. Haeu se pate tuah ma sawisawin. Telawe i neini hahatapo lawe waliko. I Masiwi tapein ti lawe masiwi. <sup>16</sup>Mewenae i tap tahi matean. Lalape xewai totonan, tap tel xohi uke hani kapin. Tap tel niningahiwen i ma tin tap tel pon ningahian. Kako haxawawa axan ma sameniwa lalape pohen lian tehue. Salan wanen.

<sup>17</sup>Honewa teka laha kilan moni kum hanasanas. Laha kum hana hahatapo namilolaha hani soxialaha nake i kum pon hualialaha. Hana hatapoa namilolaha hani Haeu. I tetel i waxeni kako lawe waliko ti hamuamuaiakako. <sup>18</sup>Honewa laha hapuasawa moniulaha ti hualiai seilon liai. Lawe aile hakilawa waliko tenen solian ma laha kewa ongawi ti axiai soxi hani teka seilon laha tae ti tenen na waliko. <sup>19</sup>Na laha aile ukek ien, laha masin seilon tenen laha ahingini waliko tenen solian ti hapuasai imuh ma totonalaha uke he tuah nake puki Haeu neneini nanahialaha.

<sup>20</sup>Timoti, ngahati hasoliawa hatesol waliko ti Haeu hani o ngahatian. Kum tutuai teka ailei kakain tenen tap pupuasan, tetenen i teheni axe



Haeu ma i pahoxai kakain salan tetan. Laha namiloi ukek laha pamu anesoan tuahe tetenen ti laha hahanau kumahe anesoin wanen. <sup>21</sup>Hina seilon laha soh tetenen ien ape laha aka lioi puas usiai kakai Haeu.

Tiliai kakaiak nga kamei Haeu lehe i aile hasolia hawane hani amuto hatesol.